

Pli fitg manager che derschader

Sin visita tar il schef dal Tribunal administrativ svizzer

DA CLAUDIA CADRUVI / ANR

■ **L'emprim d'october reelegia il parlament Christoph Bandli a la testa dal Tribunal administrativ federal. Il giurist grischun ha bajegià si ils ultims onns la dretgira cun 350 collavurats.**

Bandli è naschì il 1954 a Cuira ed è creschì si en il bloc dal Tivoli damanaivel da la staziun e visavi il migros. El è burgais d'Andeer, nua ch'el ha d'uffant passentà sias vacanzas. El sa regorda anc bain ch'i vegniva raschunà rumantsch en la chascharia. Sez n'ha el mai discurrì la quarta lingua. Oz dat Bandli gronda paisa ch'era l'inscripziun rumantscha «Tribunal administrativ federal» vegnia resguardada sin tuttas publicaziuns da sia dretgira. Quai na sa chapescha betg da sasez, pertge tar autras instituziuns cumpara savens l'inscripziun englaisa sco quarta lingua sin il frontispizi.

Carriera sco giurist da l'administraziun

Suenter il studi da giurisprudenza è Bandli l'emprim sa chasà a Tavau sco cussegliader giuridic. Malgrà ch'i ha plaschì bain là, è el s'embartgà suenter trais onns. «En il Grischun fissi sulet stà pussaivel da vegnir vinavant sco advocat. Ma jau hai vulì lavurar per il maun public. Era l'industria privata na fiss stà nagut per mai», explitgescha Bandli.

A Berna ha el l'emprim lavurà en l'Uffizi federal per la planisaziun dal territori. Là ha el fatg la dissertaziun davart «bajegiar ordaifer la zona da construcziun». Suenter set onns ha el midà en il departament da giustia, nua ch'el ha gidà a concepir la nova lescha davart il dretg funsil puril. Pli tard ha Bandli gidà a sviluppar la Lex Koller ed il «Koordinationsgesetz» che simplifitgescha las proceduras da permissiun, per exempel per ina lubientscha da bajegiar in rural.

Sin fundament da questa lescha han ins installà ina cumissiun da recurs. En lezza cumissiun ha Bandli l'emprima giada surpiglià la funcziun da derschader.

36 dretgiras sut in tetg

Il 2004 è Bandli daventà manader da project per organisar il Tribunal admi-



Presidiar ina nova dretgira cun tants giurists e collavurats è fadius, ma fitg interessant, di Christoph Bandli.

FOTO C. CADRUVI

nistrativ federal. 36 dretgiras u cumisiuns da recurs – ch'eran situadas en 25 differents lieus – han ins manà ensemen cun quest project. L'entschatta schaner 2007 è stà il culp da partenza per la nova dretgira. Bandli è stà l'emprim president dal Tribunal administrativ federal.

Entant che la dretgira penala a Bellinzona ha gi il 2004 in'entschatta plitost leva senza cas actuals, ha il tribunal amministrativ a Berna stuì funcziunar immediat sut grond squitsch, pertge la dretgira ha surpiglià 7500 cas pendants. «L'emprim onn avain nus anc gi tschertas difficultads. Uss pudain nus decider radund 9000 cas entaifer in onn. Ma mintg'onn vegnan forse 8000 novs cas vitiers», explitgescha Bandli. Ils cas pendants sajan in burdi che smatgia e paraliseschia, ed

ins speria ch'il parlament concedia intgins ulteriurs derschaders per ina fasa transitorica. Uschia vegniss ins da reducir las pendenzas.

President mo fin il 2010

Tuttina di Bandli ch'ils ultims onns sajan stads sia pli interessanta fasa professunala. El haja gi da manar ensemen giurists cun las pli differentas culturas da lavur. «Igl è tut auter che dad esser president d'ina dretgira ch'exista gia dapi tschuncant'onns.» La gronda part da ses temp deditgescha Bandli a la lavur administrativa da la dretgira cun ses 250 giurists e tschient auters collavurats. I resta pauc temp per la lavur da derschader sco tal. En sasez fa il giurist grischun da preschent plitost il manager che il derschader.

L'emprim d'october reelegia l'assemblea federala il president dal Tribunal federal per la perioda d'uffizi dals proxims dus onns. Per il solit sa splegan talas reelecziuns senza incaps, ed igl è da quintar che Bandli restia uschia fin il 2010 president. Suenter na po el betg pli aspirar per quest post, pertge il temp d'uffizi è limità sin quatter onns.

Son Gagl è pli datiers d'Andeer

E tge capita suenter? Bandli po s'imaginar fitg bain ch'el surpiglia suenter il presidi in'incumbensa «normala» da derschader. I fiss era bel da puspè pudair lavurar be 80 pertschien – sco pli baud cura che ses uffants eran anc pitschens, di Bandli.

La dretgira mida il 2012 domicil e va

a Son Gagl. Era quai na fiss per Bandli nagin problem. Anzi, lura fiss el in pau pli datiers dal Grischun e pli svelto sin il mises en Val Schons. Là sa senta el ozen di pli fitg da chasa che a Cuira, nua ch'el è creschì si.

Tge fa la dretgira administrativa?

La «Asylrekurskommission» è la pli enconuschenta partiziun dal Tribunal administrativ federal. Ma i dat anc autras partiziuns che s'occupan d'infrastructura, finanzas, scolaziun, economia etc. Al tribunal pon ins far recurs encunter decisziuns da l'administraziun federala. Cas grischuns haja la dretgira da preschent paucs, di Bandli. Persuenter chaschunian la Neat u il port aviativ a Turitg blers recurs. Ils blers cas vegnan decidids a scrit en ina circulara. Be paucas proceduras tractan ins en ina sala da dretgira en preschientscha dals recurrences, advocats e derschaders.

E tge derschader decida ins summa davart tge cas? Quai è ina dumonda che chaschuna en autras dretgiras adina puspè per discussiuns e controversas. En sasez dastgass Bandli sco president decider en atgna reschia, tgenins derschaders che ston examinar in dossier. Ma Bandli ha introducì da bell'entschatta in nov sistem. In program da computer tscherma tenor il principi da casualità e tenor tschertas coordinatas (lingua u tematica) il gremi dals derschaders. Quest program da computer vegn numnà «bandlimat» dals collavurats dal tribunal. La NZZ ha deditgà ina gronda contribuziun a l'invenziun dal giurist grischun e scriva a la fin da l'artigel: «I resta da sperar che questa software vegn già prest messa en funcziun anc en autras dretgiras.»